

Xuv xwm tshab txug kev txhaaj tshuaj tiv thaiv COVID-19
June 30, 2022

Kuv yog Laaj Xyooj nyob huv koom hum Hmong American Friendship thaam txug xuv xwm tshab txug tug kaab mob thoob ntuj coronavirus. Qhov xuv xwm tshab hab luj nyob rua lub hlis nuav yog FDA hab CDC tau tso cai txhaaj tshuaj tiv thaiv kaab mob COVID-19 rua cov miv nyuas noob nyoog yau dlua 5 xyoos. **Nuav txhais tau has tas cov miv nyuas noob nyoog txij le 6 hli rov sau puav leej txhaaj tshuaj tiv thaiv kaab mob tau taag nrho.**

Muaj qho leej nam txiv kuj xaav has tas cov miv nyuas yau tsi taag yuav txhaaj tshuaj tiv thaiv kaab mob vim tas puab txawm kis tau COVID los puab tsi mob nyaav. Feem ntau ntawm cov miv nyuas yau yeej yog le nuav tag, ib txha los kuj mob heev le hab. Muaj qho leej kuj tuag taug. COVID yog ib tug kaab mob phom sij heev – hab kis tau yooj yim – tshaaj le mob khaub thuas. Ntxiv ntawd, peb tseem naj nub kawm ntxiv txug tug kaab mob COVID, peb paub has tas muaj qho leej kuj yuav muaj lwm yaam kev mob nrug yug moog ntau xyoo tom ntej los muaj.

Nuav yog qho yaam tswv yim has tas vim le caag koj hab koj cov miv nyuas yuav tsum tau txhaaj tshuaj tiv thaiv kaab mob:

Qhov ib, muab cov miv nyuas txhaaj tshuaj yuav paab tiv thaiv tau txhua leej txhua tug. Cov miv nyuas yau kws kis tau tug kaab mob COVID kuj yuav kis tau rua lwm tug tuab neeg.

Cov txhaaj tshuaj coob npaum le caag mas cov yuav kis kaab mob yuav tsawg npaum le ntawd nyob huv lub zej zog.

Qhov ob, txhaaj tshuaj tiv thaiv COVID feem ntau yuav tsi mob npaum le txhaaj lwm hom tshuaj. Cov miv nyuas yau tsuas txhaaj ntau le ib feem kaum ntawm koob kws txhaaj rua ib tug quas laug xwb, txhais has tas cov kua tshuaj tsawg heev. Txhaaj koob tshuaj nuav sai sai xwb hab tseem tsi mob heev le lwm hom tshuaj vim siv kua tshuaj tsawg tsawg xwb.

Qhov peb, kev mob yuav tshwm sim tom qaab txhaaj tshuaj taag kuj yuav tsi heev rua cov miv nyuas. Cov miv nyuas feem ntau yeej thev taug cov koob tshuaj txhaaj nuav zoo heev.

Cov tuab neeg mob COVID moog pw khu mob kuj coob quas zug tuaj. Yuav luag yog 4,800 tug tuab neeg tau moog pw khu mob txhua nub nyob rua huv teb chaws Amelikas nuav. Ntau tshaaj le 1 laab tug tuab neeg tau tuag. Txhaaj tshuaj tiv thaiv coob npaum le caag haj yam zoo txhaj le yuav txu tau tug naab npawb nuav kom nqeg.

Peb nyob rua huv Koom hum Hmong American Friendship peb xaav ua peb feem le peb ua tau hab. Peb nrug rua Children's Community Health Plan yuav rov qaab muaj txhaaj tshuaj rua nub Saturday, July 9th. Peb yuav txhaaj tau rua cov miv nyuav muaj noob nyoog txij le 6 hli rov sau! Yog xaav paub ntxiv thov moog saib nyob rua huv qhov Facebook page.

Yog koj muaj lug nug dlaab tsi, thov hu tau rua koj tug kws khu mob miv nyuas yau los sis hu rua peb tug xuv tooj muab kev paab ntawm 414-465-9504. Yog has tas koj los sis koj tsev tuab neeg xaav txhaaj ib koob tshuaj tiv thaiv COVID-19 los sis koob booster nua peb vaam tas yuav tau ntsib koj rua July 9th!